

## Mchungaji Mpole na Anayejali

*Atalilisba kundi lake kama mchungaji, Atawakusanya wana-kondoo mikononi mwake; Na kuwachukua kifuni mwake, Nao wanyonyeshao atawaongoza polepole.—*  
**Isaya 40:11.**

**W**atendakazi wa kweli wanatembea na kufanya kazi kwa imani. Wakati fulani wanachoka wanapoona kazi ikiendelea taratibu wakati vita vinapoendelea kuimarika kati ya nguvu za wema na uovu. Lakini ikiwa watakataa kushindwa au kukatishwa tamaa watayaona mawingu yakitoweka na ahadi ya ukombozi ikitimia. Katikati ya ukungu ambao Shetani amewazungushia, wataona mwangaza wa miale angavu ya Jua la Haki.

Fanya kazi kwa imani, na umwachie Mungu matokeo yake. Omba kwa imani, na kisha siri ya utendaji Wake italeta majibu yake. Nyakati zingine inaweza kuonekana kwamba hauwezi kufanikiwa. Lakini fanya kazi na uamini, ukiweka katika juhudi zako imani, tumaini na ujasiri. Baada ya kufanya kile uwezacho, umngoje Bwana, ukitangaza uaminifu Wake, na ndipo atakapolitimiza Neno Lake.

Ngojea, si kwa wasiwasi wa kutoridhika, bali kwa imani isiyo na shaka na tumaini lisilotikiswa. “Mungu akiwapo upande wetu, ni nani aliye juu yetu? Yeye asiyemwachilia Mwana wake mwenyewe, bali alimtoa kwa ajili yetu sisi sote, atakosaje kutukirimia na mambo yote pamoja naye?” (Warumi 8:31, 32) (Testimonies for the Church 7:245).

Baba yetu wa mbinguni anazo njia elfu moja za kutupatia mahitaji ambazo hatujui chochote juu yake. Wale wanaokubali kanuni moja ya kuuinua huduma ya Mungu juu zaidi wataona mashaka yakitoweka na njia iliyo wazi mbele ya miguu yao.

Utekelezaji wa uaminifu kwa majukumu ya leo ni maandalizi bora kwa ajili ya majaribu ya kesho. Usikusanye pamoja shughuli na masumbuko ya kesho na kuyaongeza kwenye mzigo wa leo....

Hebu tuwe na tumaini na ujasiri. Kukata tamaa katika kazi ya Mungu ni dhambi na kukosa busara. Anayajua mahitaji yetu yote. Katika uweza wote wa Mfalme wa wafalme Mungu wetu mtunza maagano anaunganisha upole na utunzaji wa mchungaji mwema. Uweza Wake ni mkamilifu, na ni ishara ya uhakika wa utimilifu wa ahadi Zake kwa wote wanaomwamini Yeye. Anao uwezo wa kuondoa magumu yote, kiasi kwamba wale wanaomtumikia Yeye na kuheshimu njia Anazotumia waweze kuwezesha. Upendo Wake ni wa juu sana kuliko upendo mwingine wowote kama mbingu zilivyo juu sana mbali na dunia. Anawatunza watoto Wake kwa upendo ambao haupimiki na ni wa milele.

Katika siku za giza kuu, kadiri zinavyoonekana kuwa za kutisha mno, mwamini Mungu. Anayatimiza mapenzi Yake, akiyafanya mambo yote vyema kwa niaba ya watu Wake. Uwezo wa wale wampendao na kumtumikia Yeye utafanywa upya siku kwa siku.

Anaweza na yuko tayari kuwapatia watumishi Wake msaada wote wanaouhitaji. Atawapatia hekima ambayo inahitajika katika mahitaji yao muhimu  
**(The Ministry of Healing, 481, 482).**